

16.  
*DISSERTATIO THEOLOGICA*  
*JURIS ECCLESIASTICI MATRIMONIALIS*

in legem divinam

*Lev. XVIII. 6.*

D E

NON APPROPINQUANDO

A D

CARNEM CARNIS SUÆ

A D

REVELANDAM NUDITATEM,

quam,

juvante Deo,

*SUB PRÆSIDIO*

CHRISTOPHORI MATTHÆI  
PFAFFII,

S. S. Theol. Doct. ac Professoris Primarii,  
Univerf. Tubing. Cancellarii Ecclesiæque Præpositi,  
Abbatis Laureacensis,

*ad d.*

*Febr. 1732.*

defendent

HENRICUS EBERHARDUS HIEMER, Rosenfeld.  
VILHELM. JEREMIAS JACOB. CLESS, Schüzing.  
CHRISTOPH. ULRICUS REUCHLIN, Alto-Twiel.  
Philos. Magistri, S. S. Theol. Stud. & Ser. Stip.

*TUBINGÆ* impressit GEORGIUS FRIDERICUS PFELICKE.

WELLCOME INSTITUTE LIBRARY

WELLCOME INSTITUTE LIBRARY

53700 (3)







# PRÆFATIO.



Um in decisionibus casuum de gradibus prohibitis & Theologi & Jcti communiter recurrant ad regulam generalem Lev. XVIII. 6. nobisque nuper in Collegio privato casuali subnata fuerit occasio illam penitiùs evolendi, placuit, cogitata nostra in

chartam hanc paucis transferre. Ut per ea major argumento dubio & difficili accrescat lux, id quidem est, quod & optamus & intendimus. Saltem sentient sic oculati, ubi pedem figere liceat cum fundamento. Regula ista generalis hæc est:

*Lev. XVIII. 6.*

אִישׁ אִישׁ אֶל-כָּל-שָׂאֵר בֶּשֶׂר לֹא תִקְרְבוּ לְגִלּוֹת עֲרֻוַּת  
אֹנִי יְהוָה :

Ad verbum :

*Vir vir ad omnem carnem carnis suæ ne appropinquetis ad revelandam nuditatem. Ego Deus.*

Sensus est:

*Nemo cum proximâ suâ consanguineâ aut affini concumbito. Divinam legem violâsse se scito, qui contra fecerit.*

A

Ex-



## Explicatio.

איש איש ] *Vir Vir* h. e. unusquisque. Grammatici notant, nomen substantivum in singulari numero eodemque etiam casu repetitum distributionem quoque denotare, ita ut alterum loco adjectivi distributivi sit, quo careant Hebræi. Hanc in rem plurima exempla conglomeravere Buxtorffius in Thesauro grammatico L. 2. C. 2. p. 348. 349. Glassius in Grammaticâ sacrâ L. 3. tr. 1. Can. 5. p. 19. 20. & Hillerus in institut. linguæ sanctæ P. 2. p. 32. ubi & inter alia has ipsas voces allegant. Rabbinii existimant, eandem vocem hîc ob emphasin repeti, ut summa prorsus universalitas indigitetur, & sub eâdem & gentes cum Judæis comprehendantur. Ita Doctores Talmudici:

הנו רבנו איש מה תל איש איש לרבות את הגוים שמוזהרין על העריות כשׂראל:  
*Tradunt Doctores nostri: Vir quid? Sensus est, dici Vir Vir ad comprehendendos gentiles, qui admonentur de incestibus, uti Israëlita.*  
 Loca collegere Seldenus de J. N. & G. secundum discipl. Ebr. L. 5. C. 11. p. 620. 621. & Meyerus in uxore Christianâ de gradibus prohibitis C. 3. §. 2. sqq. p. 14. sqq. qui posterior ibidem, uti & C. 14. §. 3. 4. p. 196. laudat quoque Abenesram ad h. l. cujus verò mens hoc peculiare habet, quòd existimavit, gentibus hos incestus saltem prohiberi in terrâ sanctâ, ne illam polluant. Affert verò & idem Abenesra rationem, cur איש איש hîc gentes quoque comprehendat, quoniam sc. haud dicatur איש מבית ישראל *Vir Vir de domo Israël*, quemadmodum Lev. XVII. 3. 8. 10. 13. XX. 2. Ezech. XIV. 4. sed איש איש *Vir Vir* simpliciter. Ast precariam esse hanc probationem patet ex Lev. XV. 2. Num. V. 12. etsi alicubi & gentes voces istæ sic junctæ comprehendant. Lev. XXIV. 15. Rabbinorum cogitata sequuntur Interpretes Christiani passim, ex hâc ipsâ voce repetitâ arguentes, leges hæc Lev. XVIII. occurrentes non tantum esse Judæis datas, sed & universum genus humanum obligare. Vide saltem Hochstetteri Colleg. Pufendorf. p. 420. Jam verò, cum omnes hæc leges naturales haud sint, leges hîc *morales positivas* vel *positivas universales* fingere necessum fuit, Rabbinis hîc præeuntibus, qui, ubi inter leges naturales, quas מצוות השכליות *præcepta intellectua-*



lia h. e. naturâ intellectui inscripta & תורות השמיעות *leges auditas* sive positivas distinguunt, has iterum in *universales*, ad quas referunt præcepta Noachica & ipsas quoque has leges matrimoniales Lev. XVIII. occurrentes, & *particulares*, Judæis solis datas, carimoniales illas & forenses dividunt. Vide Seldeni librum citatum ferè per totum. Constat, Viros cel. Thomasiû & Buddeum, licet primû leges hasce positivas universales magno conatu defenderent, postea tamen ob perspectas difficultates heic occurrentes recantâsse, illum quidem maximè in Observ. Hal. T. 6. obs. 27. p. 255. sqq. & in fundam. Juris N. & G. cap. procœmiali §. 16. & p. 186. itemque in responso in causâ Gœzianâ dato alibique, hunc in instit. Theol. mor. P. 2. C. 1. §. 10. 11. defendentibus desertam ab illis sententiam Webero in diss. de legibus positivis universalibus Giesæ A. 1705. editâ, cui verò Thomasiû in fund. J. N. & G. cap. procœm. p. 10. edit. quartæ respondit, Hochstettero in Coll. Pufend. p. 135. sqq. 419. sqq. & de jure pœnarum p. 98. 99. Klausingio in diss. de legibus divinis positivis universalibus generatim spectatis Witteb. A. 1711. editâ, Mœllenhofio in duabus dissertationibus de legibus divinis positivis universalibus speciatim consideratis ibidem defensis, Grammlichio in vindiciis legum divinarum positivarum universalium Thomasiû & Buddeo Altorf I A. 1716. oppositis, G. L. Menkenio in diss. de jure Principis Evangelici circa divortia th. 1. §. 11. sqq. p. 10. sqq. Ripero in diss. de lege ac legibus divinis in genere & de legibus divinis positivis universalibus in specie P. 3. p. 156. sqq. & eodem Klausingio, Theologo nunc Lipsiensi in diss. secundâ de nuptiis propinquorum jure divino prohibitis Andreæ Hojeri diagrammati de nuptiis propinquorum jure divino non prohibitis Lipsiæ A. 1726. oppositâ. Addendi sunt, qui contra easdem leges divinas positivas non sine magnâ veritatis specie depugnare, Brücknerus in decis. matrim. P. 1. in procœmio de differentiâ legum, non sanè refutatus neque à Thomasiû in Jurispr. div. L. 1. C. 2. §. 119. in notâ, neque à Beyero in diss. de dispensatione in gradibus prohibitis §. 43. 44. J. M. Langius, Theologus tum Altorfinus in diss. ad h. l. de nuptiis ob consanguinitatem controversis p. 20. sqq. ill. Bœhmerus vel potius Kayserus in diss. de Jure Principis Evangelici circa divortia C. 2. §. 2. sqq. p. 27. sqq. & cl. Canzius in usu Philosophiæ Leibnitianæ & Wol-



fianæ in Theologiâ p. 468. sqq. Ita & leges matrimoniales Lev. XVIII.  
 occurrentes, quæ non sunt naturales, ante hanc promulgationem  
 haud valuisse quidem, sed vi illius positivas universales demùm evasis-  
 se statuit Stryckius de nullitate matrimonii §. 17. 18. particulares verò  
 saltem fuisse & forenses solis Judæis datas præter Thomam Aqu. San-  
 chezium, Gregor. de Valentia, Laymannum, Corn. à Lapide, Bel-  
 larminum aliosque Pontificios ex nostris statuerunt Lutherus, Me-  
 lanchthon, Brentius aliique permulti apud Brücknerum l. c. C. 5.  
 p. 266. sqq. Brücknerus ipse ex recentioribus, aliique Jcti, uti &  
 Lynckerus Vol. 1. resp. 6. n. 24. 30. 41. & resol. for. 637. f. 1170.  
 & ex Theologis nuperis Niemejerus de Conjugiis prohibitis diff. 5.  
 §. 24. 25. 26. & diff. 9. §. 15. sqq. maximè §. 58. sqq. qui hîc F.  
 U. Calixtum de hæresi & Schismate §. 170. p. 137. & in addendis p.  
 69. eandem sententiam tenentem sequitur. Jam verò saltem adversa  
 opinio ex vocibus *וְאִתְּךָ* *Vir vir*, uti vidimus, haud sequitur.  
 Atqui verò sequitur, ais, cùm suadeat hoc 1. introitus Lev. XVIII.  
 ubi dicitur: *Ego Dominus sum, Deus vester, & vidturos esse in his*  
*statutis, qui ea observaverint* comm. 2. 4. 5. 2. vox *תועבות* *abomina-*  
*tiones*, quâ notentur transgressionibus contra has leges factæ, 3. pœnæ  
 capitales transgressoribus harum legum dictatæ Lev. XX. 11. sqq. 4.  
 naturalis ratio, ex quâ prohibitiones istæ deducantur Lev. XVIII. 6.  
 5. exterminium gentis Cananæ ob violatas *omnes* has leges factum  
 comm. 24. sqq. Si enim legibus hisce obligatæ fuere gentes Cananæ,  
 obstrictum iis fuit quoque totum genus humanum, antequam Judæis  
 fuissent solenniter præscriptæ. 6. clausula ibid. quâ dicitur, his transgres-  
 sionibus *pollutam* fuisse terram cum incolis, id quod innuat crimina in  
 se & suâ naturâ objectivè turpia, universaliter prohibita. Sed verò novæ  
 hæ rationes sunt, quæ nondum evincunt, & ex repetitâ voce *וְאִתְּךָ*  
 hanc thesin fluere. Ast & illæ ipsæ suis laborant difficultatibus. Prima.  
 Jam enim & leges cærimoniales subinde adjectum illud habent: *Ego*  
*Jehova*. Vide Lev. XI. 44. XIX. 10. 25. XXIII. 22. 43. XXV. 55.  
 Num. X. 10. XV. 41. Porrò sine dubio & vita illis Judæis promissa  
 est, qui præter leges naturales & cærimoniales & forenses servaturi essent  
 Ezech. XX. 11. cùm utrumque à Deo ipsis esset injunctum per mandata  
 quoque pœnalia. Quo ipso tamen non de vitâ saltem corporali, sed &



& æternâ hîc existimaverim agi Rom. X. 5. Gal. III. 12. uti & ad h. l. Onkelos , consentientibus Rabbiniis apud Meyerum l. c. C. 1. §. 16. Vide & Niemejerum de conjugiiis prohibitis diff. 9. §. 30. 31. Secunda. Scilicet vox תועבות *abominations* & de legum particularium transgressionibus usurpatur Deut. XIV. 3. XVII. 1. XXIV. 4. Tertia. Namque & pœnæ capitales subinde dictantur legum cærimonialium & forensium transgressoribus. Vide Brücknerum l. c. C. 5. n. 16. p. 252. 253. Imò non omnibus transgressoribus Legum Lev. XVIII. & XX. occurrentium pœnæ capitales dictatæ sunt. Vide Lev. XX. 17. sqq. Neque & omnes istæ nuptiæ maledictionibus Deut. XXVII. 20. sqq. elatis subjacent. Etsi & hoc ipsum non innuat , connubia illa jure universali haud prohibita adeoque dispensabilia esse. Quarta. Non enim stringunt omnes rationes naturales , ut jure naturæ vel saltem universali aliquid prohibitum esse censeatur. Possunt enim & particulares leges rationibus naturalibus inniti , convenientiam naturæ vel honestatis aut decori naturalis insinuantibus. Ratio præcipuè de *carne carnis* , licet naturalis sit , ita tamen comparata est , ut plurimum restringenda veniat. Neque enim omnium consanguineorum & affinium conjugium prohibitum est. Quinta. Si enim exterminio punita fuit gens Cananæa ob *omnium* harum legum transgressionem , cur ejusmodi nuptias in suo populo mox toleravit , mox injunxit Deus? Injunxit quippe primum , ut genus humanum se multiplicaret , id quod non fieri poterat , nisi per nuptias fratrum & sororum , nisi & per nuptias Evæ cum Adamo , ex hujus carne desumptæ adeoque vel maximè consanguineæ , id quod quidem saltem ad תחת-הפעם *hanc vicem* restrictum fuit. Gen. II. 23. Ita & toleravit Deus nuptias Abrahami cum sorore consanguineâ Sarâ , in Jacobo nuptias cum duabus sororibus simultaneas , in Amramo nuptias cum amitâ , saltem non punivit exterminio , imò oriri ex illis fecit Messiam , & ex posterioribus Mosen & Aharonem. Licet enim ad eludendum nodum dici possit ratione Abrahami , vocem אחות non semper *sororem* in stricto sensu significare , sed & neptem ex illâ vel fratre , vel comprivignam , vel agnatam , sed & sororem vel neptem adoptatam , dicitur enim Sara Thærachi , qui fuit Abrahami Pater , nurus , & ratione Amrami , vocem יודה significare quoque posse patruelem vel consobrinam , non saltem amitam , cætera



tamen exempla subsistunt. Si dixeris, *dispensasse* Deum, non fingenda, sed probanda dispensatio est, quam in connubio fratrum & sororum, quo primitus propagari genus humanum necessum fuit, factam statim esse haud probabile est, quam & in Jacobo, sanctissimo Patriarchâ, incestum jam consummatum purgasse itidem haud probabile est. Nec dici quoque potest, Deum in Jacobo *tolerasse incestum* atque ex incestu, licet remoto, voluisse, ut nasceretur Messias? Hinc minore cum difficultate, qui connubia ista ante legem hanc Judæis latam putant fuisse licita, asserere videntur, ea, quæ Lev. XVIII. 24. 26. 27. dicuntur, spectare saltem prohibitiones proximè præcedentes, vel & reliquas quoque ex Jure naturæ fluentes. Talia quippe sunt prædicata, qualia permittuntur esse à suis subjectis, & à potiori fit denominatio. Et quis diceret, ob concubitum cum uxore, quæ menstrua patitur, gentes fuisse tam severè punitas? Carimonialis illa lex est, ut patet ex Lev. XV. 19. sqq. Jam &, si verba ista l. c. in omni suâ universalitate sint sumenda, principaliter tamen spectarent saltem concubitus jure naturæ prohibitos, accessorie tantum reliquos, qui decorum saltem naturæ & honestatem publicam lædunt, si frequententur. Possunt enim sic dici punitæ gentes tam lascivæ, quæ omnem adeò pudorem deposuerint, ut non saltem connubia aliàs licita, sed, si frequententur, confusionem & scandalum haud leve paritura, frequentaverint spurcisque etiam congressibus inhiaverint, sed & incestibus jus naturæ violentibus & nefandis contra naturam criminibus sese contaminaverint. Itaque, ajunt, verba ista generalia de *omnibus* transgressionibus *simul sumtis*, non *singulis* intelligenda esse. Addunt &, nullas leges universales divina easque positivas statui posse, quarum promulgatio & quidem continuata doceri non possit, cum nulla lex positiva obliget, nisi promulgata. Neque etiam sequi, leges, quæ Cananæos obligaverint, iisque fuerint datæ, datas & esse toti generi humano omnesque homines obligare, cum à particulari ad universale haud valeat consequentia. Imò nec & hoc sequi, leges positivas universales V. T. etiam in N. T. stringere, cum dentur ejusmodi secundum Patronos hujus sententiæ, quæ in N. T. abrogatæ sint. Neque enim dici posse, leges istas matrimoniales in N. quoque T. repetitas esse. Quod enim concernat Herodis conjugium cum Herodiade fratris sui



Philippi uxore à Johanne reprehensum, esse hunc adulterii casum, Josepho narrante, quòd Herodias relicto Marito proprio adhuc vivente fratri ejus Herodi nupserit, uxorem propriam, Regis Arabum Aretæ filiam, illegitimè repudianti, legibusque forensibus Judaicis tùm adhuc valentibus & nonnisi cum exitio Reipublicæ Judaicæ abrogandis obstricto, contra quas, si & Philippus fuisset defunctus & uxor quoque propria defuncta, tamen peccaturus fuisset Herodes, cùm Herodias Philippo Salomen pepererit, Saltatricem istam, cujus meminere Evangelistæ. Conjugium verò cum novercâ, quod Paulus 1. Cor. V. 1. tantopere abominetur, militare contra Jus naturæ. Denique ajunt, vel ex eo patere, quod leges hæ particulares sint, quòd מִקֵּץ & מִשְׁפָּטֵי Lev. XVIII. 4. vocentur. Illo nomine leges *cerimoniales*, hoc *forenses* denotari. Ast, ut hoc unicum saltem tangamus, quod postremo loco hìc dicitur, nullius momenti est, tùm, quòd pleræque leges Lev. XVIII. occurrentes juris naturæ sunt, tùm, quòd voces istæ aliàs quoque ad leges naturales & Decalogum applicantur. Deut. IV. 1. V. 1. Vide tamen Niemejerum de Conjug. prohibitis diff. 9. §. 60. sqq. Unum restat idque præcipuum, quod moneamus, & quod à nemine hætenùs in hac quæstione decidenda observatum legimus. Tota res vel tandem quoad universalitatem legum harum matrimonialium redit ad Lev. XVIII. 24. 26. 27. ubi: *Ne polluamini IN OMNIBUS istis, quia IN OMNIBUS istis polluta fuere gentes, quas coram vobis ejiciam. NE faciatis ex OMNIBUS abominationibus illis. Nam OMNES abominationes istas fecere Viri terræ, quæ coram vobis est & polluta est terra.* Difficultas omnis, uti vidimus, jacet in voce OMNIS, quæ emphaticè quater repetitur. Sed constat, Ebræam vocem כָּל *omnis* non designare semper universalitatem absolutam, sed sæpius saltem universalitatem restrictam & accommodam, imò sæpius saltem idem esse ac plerique ac multi. Vide exempla. Gen. XXIV. 10. coll. 53. XLI. 48. 57. Ex. IX. 6. 25. XX. 10. coll. Lev. XXIII. 7. 8. Num. XXVIII. 18. Ex. XXXII. 3. coll. 1. Cor. X. 7. Ex. XXXII. 26. 2. Sam. XVI. 22. XVII. 14. 1. Reg. X. 24. 2. Reg. VIII. 9. 1. Chr. XIV. 17. Psal. XXII. 8. XLII. 8. LXXII. 11. CXVIII. 10. Jes. II. 2. coll. 3. XXIII. 17. Jer. IX. 26. XXVI. 9. Danj. II. 38. 39. VI. 26. Hos. VII. 4. Joël III. 1. Zeph.



II. 14. Eandem significationem habet & vox *πᾶς* *omnis* in N. T. Matth. III. 5. IV. 23. 35. X. 1. 22. XVII. 11. coll. Luc. I. 16. Matth. XXI. 26. XXIV. 9. Marc. I. 5. IX. 23. XIII. 13. Luc. VI. 26. XI. 42. XV. 1. XXI. 17. Joh. III. 26. X. 8. Actor. II. 5. 17. X. 12. 1. Cor. IX. 19. 22. X. 33. 2. Cor. IV. 8. Phil. II. 21. IV. 13. Col. I. 23. 28. 2. Theff. II. 9. 1. Tim. II. 8. 2. Tim. III. 9. IV. 16. Ebr. VI. 16. XIII. 4. Jac. III. 7. Imò nec in ipso hoc loco nostro, ubi dicitur *כל־שאר בשרו* *omnis caro carnis suæ*, vox *כל* *omnis* omnimodam universalitatem infert, uti mox videbimus. Loca conglomeravit Glassius in Rhetoricâ sacrâ Tr. 1. C. 14. p. 435. sqq. ubi agit de synecdoche generis, quæ heic obtinet. Jam verò, si vox *כל* etiam designet *plerosque* vel saltem *multos*, cum & nihil sit, quod nos cogat, hanc vocem in summâ istâ universalitate heic capere, cum sic & liberentur Patriarchæ sancti ab incestibus, cum sic statuendæ non sint leges matrimoniales positivæ universales, quæ tantis difficultatibus laborant, congruum forsan fuerit, istam vocis *כל* interpretationem synecdochicam, quæ indolem linguæ sanctæ sapit & in illâ quidem eleganter sic ponitur, hîc admittere. Quo facto, cadit argumentum aliàs vix refutabile. Neque enim & sexta ratio stringit, cum & impuritibus saltem Leviticis alibi dicatur pollui terra, idque, quod in suâ naturâ turpe est, lege naturæ sit prohibitum omne, non lege positivâ universalis. Sed, deficiente Legislatoris divini interpretatione authenticâ, nil à nobis per interpretationem doctrinalem decisum volumus. Vide & Instit. Theol. nostras app. II. de conjugio p. 750. 751. Sed quid excurrimus? Aliam adhuc sed otiosam quæstionem addunt Doctores Judæi, num, quia dicitur *וְאִם וְאִם* *Vir Vir*, prohibitio hæc solos Viros, non fœminas tangat? Statuit hoc R. Joseph, Karæus, cui tamen & Karæi alii, non sine manifestâ ratione contradixere, uti videre est apud Meyerum l. c. §. 3. p. 15. Prohibitiones quippe nuptiarum ex naturâ rei sunt reciprocæ, & si Titius prohibetur, Cajam in uxorem ducere, nec Caja Titio nubere potest. Itaque ergo in voce repetitâ *וְאִם וְאִם* synecdoche habetur speciei pro genere. Vir enim est pro homine. Vide instar omnium Gerhardum de conjugio §. 279. Adde tamen & Marckium in Sylloge diss. ad V. T. exerc. 9. ad h. l. §. 3. sqq. p. 222. sqq.



אל — כל — שׂר ] *ad omnem carnem carnis sue.* Ita ad verbum. Jam quæritur, quid sit שׂר & quid sit בשר, quam utramque vocem per *carnem* vertimus. Certè שׂר *caro* est. Ita sumitur Ps. LXXIII. 26. LXXVIII. 20. 27. Jer. LI. 35. Mich. III. 2. 3. Prov. XI. 17. nisi in postremo loco propinquos indigitet. Sumitur & pro corpore Prov. V. 11. itemque pro alimento Ex. XXI. 10. Maximè verò innuit consanguinitatem vel remotam Lev. XXV. 49. Num. XXVII. 11. ubi in priore loco per שׂר non possunt intelligi vel filii aut nepotes ex fratre, vel patruus magnus, uti putat Beyerus in diss. de dispensatione in gradibus prohibitis §. 80. cùm, uti ipse sibi hunc scrupulum format, patruelis antea sit mentio facta adeoque persona remotior sit intelligenda, vel proximam, imò & affinitatem proximam Lev. XVIII. 12. 13. 17. XX. 19. XXI. 2. Nolim vertere *reliquum* vel *reliquias*, uti quidam post Abarbenelem, qui שׂר putat idem esse ac שׂר. Nulla quippe adparet solida ratio, cur *caro* dicatur *reliquia*, Forstero licet putante, ita illam dici, quia sit reliqua pars hominis post animam, & Gussatio aliud quid fingente. Unde nec derivaverim vocem hanc à radice שׂר *reliquum* fuit. Nec enim dicitur שׂר, licet hæc vox & propinquum significare videatur Jes. XIV. 22. sed שׂר vel in statu regiminis שׂר, ut derivanda potius sit juxta præstantissimum Lexicographum nostratem Rümelinum à radice שׂר *aspexit*. Sola enim *caro* est, quæ spectabilis & visibilis est in homine. Anima aspici nescit. Vide Lexicon ipsius Biblicum p. 829. Ita & בשר *caro* sæpius propinquitatem eandem indigitat, sive remotissimam, quâ omnes homines sunt ejusdem carnis Jes. LVIII. 7. sive remotam, quâ juncti sunt ejusdem nationis cives 2. Sam. V. 1. XIX. 13. Rom. IV. 1. IX. 3. XI. 14. sive propiorem Gen. XXIX. 14. XXXVII. 27. Jud. IX. 2. De marito maximè & uxore dicitur, & *duo erunt* לֶבָשׁ *in unam carnem* Gen. II. 24. Matth. XIX. 5. Eph. V. 31. id quod & affirmatur de scortatore & scorto 1. Cor. VI. 16. Judæi in Talmude contendunt, verbis hisce interdici utrique sexui humano *carnis* seu speciei *diversæ* coitum, adeoque bestialitatem. Mox fingunt, primum hominem fuisse androgynum, deinceps verò in marem & foeminam separatum, hinc פֶּגֶשׁוֹן istam ortam. Jam & caussantur, *carnem unam* intelligendam de prole, quæ ex duobus, marito & uxore nascatur. Augustinus putat, digitum intendi *ad originem foemina,*



*qua de masculi latere creata sit.* Gen. II. 23. Vide Seldenum l. c. L. 5. C. 2. p. 563. Ast de marito & uxore dici, quòd fiant *una caro*, patet ad oculum ex Matth. XIX. 6. id quod non sanè de conjunctione animorum 1. Sam. XVIII. 3. Act. IV. 32. sed de conjunctione corporum & copula carnali explicandum est, cujus, uti & liberorum, quos procreant, & quorum sunt *unus* fons, radix, origo & stirps, intuitu *quasi una caro* reputantur, uti & Ecclesia vocatur *unum corpus morale*, ens per aggregationem. Hinc & Karæi vetustiores ex Judæis maritum & uxorem *גוף אחד* *unum corpus* efficere arbitrati ex eo id quoque probavere, quòd e. g. *nuditas uxoris Patris* vocetur ipsius *Patris nuditas*, uti refert Seldenus in uxore Ebraicâ L. 1. C. 3. sub finem, qui & addit, illos à recentioribus Karæis eapropter vocatos fuisse *מרכיבים* *Magistros inferentes*, quoniam conjugum personam alteram in alterius sic inferi seu utramque in unicam conflari statuerint. Num verò hæc verba *et erunt in unam carnem* contra polygamiam pugnent, vide disputantes ex unâ parte Theoph. Alethæum & Athanas. Vincen-  
 tium in polyg. triumph. th. 28. p. 168. sqq. Daphnæum Arcuarium in der Betrachtung des Ehstandes P. 2. C. 4. §. 13. sqq. p. 73. sqq. Brücknerum l. c. C. 13. n. 52. 53. & Willenbergium in præsid. Juris div. de polyg. sim. p. 37. 38. ex alterâ parte Siricium in uxore unâ p. 105. sqq. Musæum de conjugio th. 48. sqq. 62. & de polygamiâ contra Alethæum §. 22. Meyerum in uxore Christianâ diss. 1. sect. 1. C. 8. p. 74. sqq. Weickmannum in justitiâ causæ de polyg. simult. p. 96. sqq. & Lütkenium von der Polygamie p. 70. sqq. Hisce circa significationem vocum prænotatis, quæritur jam, quid per *omnem carnem carnis* h. l. fit intelligendum. Clarum est, ad omnes vel consanguinitate vel affinitate junctos, *caro carnis* enim hos per enallagen abstracti cum concreto significat, hanc legem non trahi sine absurditate posse. Excesse-  
 re heic Karæi, qui *שאר שרים* & *שרים* ultra, quàm fas est, multi-  
 plicârunt. Vide Seldenum l. c. L. 1. C. 3. sqq. & Meyerum l. c. C. 11. Excedunt & hîc Pontificii, de quibus ita Chemnitius in locis Theolo-  
 gicis P. 3. de conjugio f. 207. *Quam sententiam* sc. quòd nemo a  
*carnem carnis suæ accedere debeat*, Pontifices quidam malè intellexer-  
 runt, ab omnibus consanguineis, quousque cognatio cognosci potest  
*abstinendum.* Sed, addit, *emphasis vocabulorum Hebraicorum* osten-  
 di-



dit, prohiberi, ne quis ducat propinquam, quæ proximè carni suæ appropinquet, vel prohiberi carnem carnis suæ, hoc est, quæ vel ex meâ carne propagata est, vel ex cujus carne ego propagatus sum, vel quæ mecum ex eâdem carne propagata est. Etsi enim voces istæ, quas explicamus, sensum quoque latissimum fundere aptæ sint, & prohibitio matrimoniorum usque ad quartum gradum, quæ in Jure canónico existat, colorem hinc trahere aliquem possit, facile tamen apparet, restringendas esse istas ad prohibitiones proximè insequentes, & universalitatem legis non esse absolutam sed accommodam. Vide Seldenum de J. N. & G. sec. disc. Ebr. L. 4. C. 11. p. 632. sqq. & Musæum in thes. theol. de Conjugio §. 96. Certè enim aliàs & ad quartum & ultra quartum consanguinitatis & affinitatis gradum prohibendæ essent nuptiæ, id quod ἀτοπον est. Jam & notanter caro carnis dicitur, vocibus junctis, ut propinquitas carnis proximior indigitetur & gradus consanguinitatis & affinitatis proximi. Ita caro mea est uxor, cujus carnem e. g. matrem vel sororem ducere non possum. Ita caro mea est Pater, cujus carnem e. g. uxorem, novercam meam, vel sororem iterum mihi copulare haud possum. Itaque prohibetur saltem caro carnis, non ea, quæ carnis mea carnis caro est. Indigitatur autem, quod jam innuere cœpimus & porro notamus, vocibus hisce non saltem consanguinitas, sed & affinitas, utraque proxima, cum stylo Scripturæ S. maritus & uxor per copulam fiant una caro & regula ista generalis Lev. XVIII. 6. etiam ad gradus affinitatis hoc capite prohibitos applicetur. Jam verò contradicentes hîc habemus Ictos doctissimos, qui putant, ex consanguineis saltem vocari carnem carnis consanguineos in lineâ ascendente & descendente, & fratres atque sorores in lineâ collateralî, alios nullos, nullosque planè affines, id quod & verbis Chemnitii supra datis probare contendunt. Primaria ratio est, quod in prohibitionibus affinitatis nunquàm dicatur, quia tua caro est, sed, quia est nuditas Patris tui comm. 8. quia est נדה patrui tui uxor comm. 15. quia est nuditas fratris tui comm. 16. Addunt, maritum quidem & uxorem esse unam carnem sed saltem moraliter, non physicè, & inter se, non quoad tertium, hinc & cognatos unius conjugis non esse cognatos alterius. Ita post Arcudium de concordia Eccl. Occ. & Or. in admin. sacr. L. 7. C. 31. p. 469. Lynckerus in Conf. & resp.



prior. resp. 6. n. 21. sqq. f. 71. 72. itemque n. 91. sqq. f. 78. & in re-  
 solut. for. 409. & 637. p. 716. 1170. Donauerus in Conf. 49. n. 39.  
 J. J. Müllerus in dem Dispensations-Rechte in verbotenen Ehen L. 1.  
 C. 4. §. 1. 4. p. 26. 28. 29. & vel maximè Brücknerus l. c. C. 5. n.  
 40. sqq. Sed salva res est. Jam enim primò pater, filius, frater non  
 sunt *caro carnis meae*, sed sunt *caro mea*, ast patruus est *caro carnis*  
*meae*, sic & matertera. Secundò vox **בשר** *caro*, cùm dicatur de uxore,  
 affinitatem sine dubio fundat. Tertiò **שורה** *propinquitas*, quæ à  
 voce **שור** descendit, Lev. XVIII. 17. de affinibus dicitur, utpote de  
 privignâ & privigni & privignæ filiâ, quæ personæ eapropter prohibentur,  
 quia sunt *caro carnis meae*, h. e. uxoris. Licet enim, quod  
 quarto loco notamus, uxoris mei proximi consanguinei non sint *caro*  
*mea*, quia uxor est *caro mea*, tamen sunt *caro uxoris* h. e. *carnis meae*  
 adeoque mei affines. Vide Gerhardum de conjugio §. 258. Quinto  
 nec prohibitiones consanguinearum hanc semper rationem adjectam  
 habent, *quia caro tua vel caro carnis tuae est*, sed tantum comm. 12.  
 ubi amita dicitur *caro Patris* & comm. 13. ubi matertera dicitur *caro*  
*matris*. Sexto nec Chemnitii ista plena sententia est, quæ in citatis  
 verbis exprimitur, addenda enim & sunt sequentia, ubi: *Hinc & ju-*  
*dicium sumi potest de affinitate, quatenus etiam in illâ nuptiâ sunt pro-*  
*hibita. Vir & uxor sunt una caro. Ergo utrique est שור h. e. habet*  
*reliquias suæ carnis in Conjugis cognatis. Et illa affinium propinquitas*  
*ipsi est prohibita.* Vide saltem Musæum de conjugio §. 69. sqq. Bud-  
 deum in Instit. Theol. mor. p. 560. Niemejerum in diss. 2. de conju-  
 giis prohibitis §. 15. & Marckium l. c. §. 6. p. 226. sqq. Succedit nova  
 quæstio: num ex duabus hisce vocibus **כל-שאר בשר** *omnis caro carnis*  
 probari possit, quòd Lev. XVIII. non saltem expressæ personæ sed & pa-  
 res gradus vi interpretationis extensivæ prohibeantur? Sunt, qui prius  
 tenent. Ita, ut taceamus jam Bellarminum & Arcudium, olim Lutherus,  
 Georgius, Princeps Anhaltinus, Bucerus, Brentius, ita Christoph.  
 Arnoldus, Mauferus, Fichardus, Wefenbecius, Hornejus, Richterius,  
 ita & Grotius, Lynckerus ll. cc. & Müllerus l. c. L. 1. C. 4. §. 2. sqq. p.  
 26. sqq. ita & Brücknerus l. c. C. 6. qui & h. l. n. 3. 4. p. 305. 306. re-  
 ctè observat, Lutherum sententiam suam non mutavisse, quæ & Stry-  
 ckii observatio in diss. de nullitate matrimonii §. 20. ita Facultates va-



riæ & Theologicæ & Juridicæ, Halensis maximè, ita & Consistoria varia, quorum præjudicia referunt idem Brücknerus & Stryckius, qui posterior & in notis ad Brunnemanni Jus eccles. L. 2. C. 16. §. 21. sqq. conferendus est, & probabiliorem hanc sententiam de personis expressis saltem prohibitis esse ait. Ita ferè & ex recentioribus Theologis nostris Spenerus in resp. Theol. lat. P. 2. C. 4. p. 105. & J. M. Langius in diss. de nuptiis ad Lev. XVIII. 6. §. 25. 26. p. 27. 28. maximè Niemejerus in diss. 5. de Conjugiis prohibitis §. 26. sqq. & diss. 10. §. 6. sqq. qui & idem de Luthero observat. Jam & novissimè Augustinus Leyserus in medit. ad Pandectas Vol. 5. p. 35. sqq. huic sententiæ accessit. Communior verò & passim recepta sententia est, non saltem personas Lev. XVIII. expressas, sed pares quoque gradus prohibitos esse. Ad hanc probandam ante omnia ad textum nostrum provocatur, quem putant regulam generalem continere, ad quam exigenda veniant matrimonia. Argumentum eo speciosius est, quòd ratio, ex quâ divinus Legislator prohibitiones matrimoniales elicit & naturalis & generalis est. Quæcunque est *caro carnis meæ*, illius concubitus, illius nuptiæ sunt prohibitiæ. Jam subsumendæ heic sunt personæ quoque non expressæ. *Caro mea* est Pater, mater, omnesque ascendentes; itemque filius & filia omnesque descendentes in lineâ rectâ, frater quoque & soror juxta comma 12. 13. Ita & uxor *caro mea* est Gen. II. 23. 24. Jam *carnis meæ caro* est vitricus & noverca omnesque horum majores & alteri conjuges, cum quibus fiunt *una caro*, quemadmodum & privignus & privigna, omnesque horum descendentes & alteri Conjuges, rursus socer & socrus, horumque ascendentes, gener & nurus horumque descendentes & conjuges, patruus, avunculus eorumque majores, imò & uxores, quæ cum ipsis fiunt una caro, amita, matertera & harum quoque majores & mariti; qui & cum illis *unam carnem* faciunt, nepos & neptis ex fratre vel sorore horumque descendentes omnes eorumque conjuges, levir, fratria, uxoris soror, sororis maritus. Confer Weberi comment. de eo, quod justum est circa cognationes in nuptiis p. 13. sqq. Et sic quidem non primùm saltem sed & secundum affinitatis genus in nostro textu prohibitum fuerit, cum &, ubi liberorum nuptiæ & remotior gradus prohibitus est, parentum quoque nuptiæ & propior gradus prohibitus



sit. Ita & comprivignorum nuptiæ prohibitæ videri possint , si no-  
verca patri pariat. Hic enim partus *mea caro* est , utpote soror con-  
sanguinea , & comprivigna hujus *caro* eâdem ratione , per consequens  
hæc est *carnis mea caro* adeoque mihi prohibita. Nec diffitendum  
est , rationes Bohlii , quem & secutus est Thomasius , contra conju-  
gium comprivignorum ex Lev. XVIII. 9. 11. petitas , præcipuè illam  
ex voce מולדת depromptam , haud esse nihili. Jam cum , omnes istæ  
personæ supra nominatæ & indigitatæ Lev. XVIII. non exprimantur &  
tamen sub *carne* & *carne carnis* latitent , sequi videtur , non personas  
saltem expressas sed & pares gradus esse prohibitos. Unde , si Patri  
haud licet , ducere filiam , nec avo licet ducere neptem , si novercam ,  
si nurum haud ducere licet , ergo nec socrum , si patrui viduam haud  
ducere licet , ergo nec avunculi & sic deinceps. Si concessæ essent hæ  
nuptiæ non expressæ , quarum tot dari possunt exempla , cur ponere-  
tur regula ista generalis , sub quâ continentur ? Rectè itaque vi hujus  
regulæ generalis dici putant , in jure divino nuptias esse prohibitas in  
lineâ rectâ in infinitum , in lineâ collateralī æquali in gradu primo &  
inæquali in gradu secundo tum in consanguinitate , tum & affinitate.  
Hic verò poneadum esse terminum , cum saltem *caro carnis mea* , non  
*carnis mea carnis caro* mihi sit prohibita. Ita enim licitum esse e. g.  
sororis suæ mariti sororem ducere , cum sororis , utpote *carnis mea* ,  
maritus quidem sit *caro carnis mea* , sed non ipsius soror , quæ saltem  
*carnis mea carnis caro* est. Addunt , qui hanc sententiam tenent , in  
lineâ ascendente & descendente extra litem esse , quod & pares prohi-  
biti sint gradus , id quod & ob paritatem rationis de lineâ collate-  
rali dicendum veniat. Quæ enim ratio Legislatorem moverit ad hanc  
personam prohibendam , eandem & militare contra alteram in si-  
mili gradu , licet non expressam. Sed regerunt , qui putant , perso-  
nas saltem expressas Lev. XVIII. prohibitas esse , primò , omnes istas  
prohibitiones matrimoniales Lev. XVIII. occurrentes esse saltem exce-  
ptiones à regulâ , quæ nuptias cum quavis permittat. Jam cum exce-  
ptiones firmant regulam in casibus non exceptis , sub istâ regulâ  
contineri omnes nuptias , quæ specificè haud excipiantur. Reponunt  
secundò , paritatem rationis in his , quæ juris positi sint & ex arbi-  
trio Legislatoris pendeant , non semper operari , nec esse fundamen-  
tum



tum irrefragabile interpretationis extensivæ, quæ & eapropter, quod tertio loco monent, hîc non valeat, quia odiosorum, qualia sunt & prohibitiones, strictior & benignior debeat esse interpretatio, uti egregiè Bonifacius VIII. Pontifex cap. 15. & 49. de regulis Juris in 6. & Imperator I. §. 8. de J. N. & G. ff. l. 2. 19. de lib. & posth. hæ. l. 3. de his; quæ in test. del. & l. 32. 42. de pœnis alibique. Conferri possunt Barbosa L. 3. C. 16. axiom. 5. L. 14. C. 120. ax. 4. L. 16. C. 7. ax. 13. lim. 1. Grotius de jure belli & pacis L. 2. C. 16. §. 8. 12. 20. sqq. Pufendorffius de jure naturæ & gentium L. 5. C. 12. §. 10. 12. 13. 17. 19. 21. 22. & de officio hominis & civis L. 1. C. 17. §. 8. sqq. itemque Harpprechtus in Consil. Tubing. Vol. I. Cons. 24. f. 482. n. 110. Etsi enim regula illa multis utique exceptionibus & limitationibus obnoxia sit, uti videre est apud Thomassium in diss. de nævis Jurispr. Rom. coroll. 3. 4. in Jurispr. div. Lib. 12. C. 12. n. 160. sqq. p. 364. sqq. & in append. contra Placcium p. 372. sqq. itemque in der Aufsübung der Vernunft - Lehre C. 3. §. 116. sqq. p. 210. sqq. Titium & Barbeyracium ad Pufendorffii l. c. Hornium in prælect. de interpretatione juridicâ C. 3. 4. Kemmerichium in access. institut. juris civilis tit. 12. p. 135. sqq. Pellerum in diss. de interpretatione legum politicâ C. I. §. 12. 13. p. 24. sqq. & Wölkerum in diss. de privilegiis odiosis & pœnalibus C. 5. §. 2. p. 61. exceptiones tamen istas & limitationes nostram quæstionem non ferire, ubi ratio prohibitionum generalis nec unica sit, uti vel ex solo comm. 18. pateat, & ob rationes speciales necessariò restringenda veniat, imo ab ipso summo Legislatore restricta fuerit. Jam enim contendunt quartò, rationes exstare, ob quas nuptiæ in pari gradu mox prohibitæ fuerint, mox concessæ. Ita nuptias Leviri cum Fratriâ, ex quâ Frater liberos suscepit, esse vetitas, quia noluerit Deus, ut duo fratres in unius mulieris uterum semen effunderent, sed esse licitas in simili gradu cum uxoris defunctæ sorore, ubi ratio ista cesset, sic easdem nuptias Leviri cum fratriâ, si frater liberos ex ea suscepisset, prohibuisse Deum in favorem liberorum prioris matrimonii, ne illi parte hæreditatis paternæ per liberos succedaneos defraudarentur, & ne duo primogeniti ex duobus fratribus concurrentes in rixas & contentiones dilaberentur, fratreaudem defuncto ἀτέλειω, cessantibus prohibitionis rationibus cessavisse pro-



prohibitionem ipsam , imo ad conservanda bona in familiâ Levirum cum fratris defuncti viduâ , nisi infamiæ notam incurrere maluerit , matrimonium contrahere debuisse Deut. XXV. 5. sqq. non obstante ratione istâ ex *carne carnis* Lev. XVIII. 6. prohibitâ depromptâ , ex quo ipso pateat , illam per alias rationes politicas & œconomicas in casibus non expressis utique infringi & limitari posse. Ita & prohiberi Patruï viduam , sed non Avunculi , quoniam Patruï uxor per conjugium ex alienâ eandem cum Patre familiam , Avunculi vero uxor per conjugium familiam diversam à Patris familiâ intraverit , adeoque respectus & honor maternus illi haud debeatur. Ita & conjugium esse prohibitum cum amitâ & materterâ ob eundem respectum , sed non prohibitum , causa hac exulante , cum nepte ex fratre & sorore , quia hæc patruo vel avunculo subijci possit , ut uxor , secus mihi matertera vel amita , quibus respectum parentelæ debeo , & quæ , ut mihi subjiciantur , haud convenit. Ita porro conjugium cum Patruï viduâ prohibitum esse , quia non conveniat , ut mares , sanguine juncti in ejusdem fœminæ uterum semen immittant , sed concessum cum nepte ex fratre vel sorore , ubi hæc ratio cesset. Certè nullam exstare prohibitionem divinam , ubi casus sit inversus , & respectus parentelæ exulet , etsi ratio à *carne carnis* prohibitâ ducta ubique militet. Unde & quintò ajunt , ipsum Legislatorem Divinum prohibitionem istam generalem ad personas sequentes expressas accommodasse & restrinxisse , imo & quoad has fecisse exceptiones , ut ostenderet , nolle se , ut prohibitio ista generalis in omni generalitate sua valeat. Sic , licet nuptiæ Leviri cum fratriâ sint prohibitæ , injungi tamen illas , fratre sine liberis mortuo , licet hujus vidua haud cesset esse Leviri *carnis caro*. Id quod eò magis mirum videri possit , quia hoc leviratûs jus & apud Ægyptios olim viguit teste Imp. Zenone l. 8. cod. de incestis & inutilibus nuptiis , observantibus Marshamo in canone Chronico p. 173. & Witsio in Ægyptiacis L. 1. C. 5. §. 8. p. 20. cum tamen leges suas matrimoniales Ægyptiis opposuerit Deus Lev. XVIII. 3. Ita & licitas esse nuptias cum defunctæ uxoris sorore juxta comma 18. nisi quidem ad eludendum argumentum à casu excepto regulam in casibus non exceptis firmante depromptum vel vocem מִן per *alteram* veritas , atque cum Sadducæis , Karæis , Beza , Hafenreffer , Harpprecht , Tarnovio ,  
Have-



Havemannio , Carpzovio , Calovio , Scherzero , Riveto , Coccejo , Meyero , Marckio , aliis polygamiam heic prohibitam censeas , licet & Polygamiae defensores ex hoc ipso textu argumentum forment , quia saltem uxoris soror sit prohibita , vivente uxore , non alia , quæ soror non esset , ita arguente Theophilo Alethæo l. c. th. 68. p. 369. Daphnæo Arcuario l. c. P. 3. C. 1. §. 6. p. 116. & Willenbergio l. c. C. 2. §. 3. p. 13. vel putes , tantam esse vim Athnachi sub תקן , ut sensus sit : *uxoris sororem nunquam ducito , nedum ad affligendam illam , in vitâ ejus* , vel existimes , ביתו in vitâ ejus referendum esse non ad uxorem sed ad sororem & significare idem , quod *nunquam* , vel etiam *ajas* ; clausulam *ad affligendam eam in vita ejus* non esse restrictivam sed exaggerativam , unde , cessante licet unâ ratione , tamen , cùm altera prohibitionis causa non cesset , à primo affinitatis gradu prohibito quæ desumta sit , ita enim nuptiæ Leviri cum fratriâ prohibitæ sunt , ex eo , quod conjugium prohibitum sit cum uxoris viventis sorore , non sequi , ergo id licitum esse , illâ mortuâ , uti e. g. ex eo , quod Prov. XXIII. 22. dicitur , *ne contemnas matrem tuam in senectute* , non sequatur , ergo licet eam contemnere , ubi nondum consenuit , item ex eo , quod Eccles. XII. 1. dicitur : *memento Creatoris tui in juventute tuâ* , non sequatur , ergo licet ejus non meminisse in senectute , & ex eo , quando dicitur : *ne fureris patre tuo vivo ad affligendum illum* , non sequatur , ergo licet furari post mortem ejus. Conferri hîc possunt primò quidem Basilii M. ad Diodorum Tarsensem (hi enim ambo disputationis hoc de argumento ferram reciprocavere , totam controversiam fusè enarrante Arcudio in capite supra p. 11. citato) epistola , dein Hoffmanni , Grotii , Bucholzii , Havemanni , Strauchii , Wagenseilii , Blountii , Ittigii aliorumque hanc in rem scripta , Oettingensia quoque , dissertationes Brückneri , Niemejeri aliorumque , scripta Gœzii & Kettneri hûc spectantia , uti & Buddeus in Instit. Theol. mor. P. 2. c. 3. sect. 6. §. 13. in notâ ultimâ p. 564. ubi putat , Deum has nuptias licet primæ institutioni divinæ & fundamentis legum matrimonialium adversas tamen hâc lege concessisse Judæis ex conniventia , uti polygamiam & divortia. Addunt sexto & hoc , si prohibitiones istæ non saltem personas , sed & similes gradus tangant , nullam adparere rationem , cur sapientissimus Legislatoꝝ prohibeat nuptias cùm distin-

C

Etis



Etis personis ejusdem gradus , hinc enim tautologiam emerfuram , quæ  
 sine crimine ipsi imputari nequeat , nisi quidem causeris , fieri hoc ad  
 eò clariorem rei declarationem per exempla , quæ in eodem casu sine  
 vitio ταυτολογίας plura afferri , imò & cumulari possint. Ita e. g. con-  
 cupiscentiam pravam in Decalogo præcepto 9. & 10. prohiberi , quæ  
 jam implicitè prohibita fuerit præcepto 5. & sqq. Aliudque longe esse  
 ταυτολογίαν , de quâ videndum Klausingii specimen vindiciarum S. Co-  
 dicis à ταυτολογίας criminatione. Adjiciunt septimò , prorsus impropriam  
 esse phrasin *de carne carnis* , adeoque nec premi posse. Licet enim *par-  
 tus* , *antequam edatur* , *mulieris portio sit* , *vel viscerum* , tamen post  
*editum* illum hoc verum non esse , vi l. 1. §. 1. ff. de inspiciendo ven-  
 tre , uti & fructus saltem tam diu pars *fundi* sint , *quam diu fundo*  
*coherent* , post separationem autem tanquam separatum quid conside-  
 rentur , §. 36. l. de rerum divisione & l. 61. §. 8. ff. de furtis. Id quod  
 eò fortius stringat , quòd maritus , relictis parentibus , adglutinetur  
 uxori Gen. II. 24. Respondent octavò , si hæc prohibitio *de non ap-  
 propinquando ad carnem carnis* omnes nuptias prohibitas sub se com-  
 prehendat , non fore illicitas nuptias cum patruï viduâ , in lege licet  
 expresse prohibitas. Cum enim Patruï mei vidua sit Patris mei *carnis*  
*caro* , mihi sane talis esse non poterit , sed erit *carnis meæ* h. e. patris  
 mei *carnis* h. e. fratris ipsius *caro* , quæ per consequens vi hujus regu-  
 læ non est prohibita. Miror , hoc non observatum fuisse Niemejero  
 in diss. luculentâ de Conjugio cum Patruï uxore , quæ est V. in disser-  
 tationibus de conjugiiis prohibitis. Ita porro permittendas esse ajunt  
 nuptias cum proso cru , cum soceri viduâ , cum nurûs , cum privignæ  
 filiâ , quæ tamen prohibita censentur aliâs , licet non sint *caro carnis*  
*meæ* , sed *carnis meæ carnis caro* , & affinis meæ consanguineæ non  
 sint meæ affines , qui canon non , ubi linea ascendit & descendit , sed  
 transversim saltem & ad latus currit , sic valeat , ubi utique nuptiæ li-  
 citæ sunt inter duos fratres & duas sorores. Unde & nonò pateat ,  
 omnes ista personas supra *ad carnem carnis* relatas huc non pertinere ,  
 illique malè subterni. Si verò substernantur omnes , conjugium etiam  
 prohibitum fore in secundo affinitatis genere , quod tamen veram affi-  
 nitatem haud dicat , nimiasque & prohibitiones alias emerfuras , queis  
 nemo ferè calculus adperserit , uti e. g. & conjugii comprivigno-  
 rum,



rum, si noverca patri pariat, supra jam tacti. Denique decimo ajunt, utique in lineâ rectâ prohibitionem vadere in infinitum, sed probè notandum hîc esse, quod vi linguæ sanctæ pater & mater supponant pro omnibus ascendētibz, & filius & filia pro omnibus descendētibz. Vide Niemejerum in diff. 2. de Conjugiis prohibitis §. 19. & cel. Zeltnerum in diff. de genuino conjugiorum prohibitorum fundamento p. 52. Nec à lineâ rectâ ad collateralem valere consequentiam, cum in lineâ rectâ matrimonia jure naturæ prohibita sint in infinitum, quod tamen in lineâ collateralis falsissimum sit. Inæqualitatem igitur esse manifestam & eandem rationem utique stringere in prohibitionibus Juris naturæ, non verò positivi. Quicquid vero de hisce responsionibus sit, quæ *conjunctæ* quidem sed non *singulæ* stringere videntur, cum, uti patet, causa in utramque partem sit disputabilis, nemoque sit in his terris, qui interpretationem legis authenticam dare valeat, nil restat, quam ut dicamus, ad tranquillandas conscientias scrupulosas satius esse, in casu dubio tutiorem eligere partem, quæ pro similibus gradibus prohibitis pugnat. Nimium quippe hîc in vitium haud vertitur, nec nocent superflua. Concurrent hîc id, quod probabile est ratione tutioris & ratione argumentorum fortiorum ex textu sacro petitorum. Ubi, quid, re adhuc integrâ, rectè agatur, facile patet, sed quid, re non amplius integrâ agendum, & num ejusmodi conjugia toleranda aut rescindenda sint, difficilior quæstio est. Heic enim Magistratui Politico determinandum erit, quid tutius sit, solvere matrimonium, quod ratum vel simul quoque legitimum esse possit, & sic incautè ansam præbere adulterio, vel tolerare matrimonium, quod irritum in se & illegitimum esse possit. Id quod etiam ad quæstionem supra de legibus hisce matrimonialibus, num & ex parte forenses sint, evolutam suo jure quadrat, licet, istâ affirmativè decisâ, momentum posterioris hujus quæstionis mox in totum pereat. Cæterum eadem hæc controversia de personis saltem Lev. XVIII. an etiam paribus gradibus prohibitis & inter Judæos fuit agitata, Talmudicis prius, posterius Karæis defendentibus. Vide Selden uxorem Ebraicam L. I. C. I. sqq. & Meyeri uxorem Christianam in diff. de gradibus prohibitis C. 9. sqq. p. 83. lqq. Quod restat, obiter saltem ad verba, quæ explicamus, notanda venit sententia Aharonis Haccohen, cujus Abenesra ad h. l. meminit. Ait is, textum nostrum



nostrum de *propria* uniuscujusque *carne* , non de *aliena* agere , dici enim *carnem carnis suae* , adeoque prohiberi hîc peccatum mutum , quod aliâs mollities & crimen Onaniticum dicitur. Gen. XXXVIII. 9. Rom. I. 24. 1. Cor. VI. 19. Verba Abenesræ sunt : ורב אהרון הכהן אמר : שפירושו להוציא שכבת זרע לבטלה : Sed falsam esse hanc sententiam ex eo patet , quia שׂאֵר *caro* diversæ personæ intelligitur comm. 12. 13. 17. & comma 6. per sequentia explicatur , quia dicitur , כָּל-שׂאֵר *omnis caro* , quia nemo ad se ipsum appropinquat , & quia & illud peccatum longe aliis verbis aliâs in sacris literis describitur.

לֹא תִקְרְבוּ ] *ne appropinquetis*. Construitur singularis cum plurali , casus nominativus cum secunda persona pluralis numeri. En enallagen numeri , enallagen casûs. Est hæc non vitium sed elegantia linguæ sacræ. Nisi quidem cum Salomone ben Melech in Michlal Jophi ad h. l. putēs , adhiberi pluralem ad comprehendendas & fœminas , id quod tamen ficulneum est. Confer Seldenum Ux. Ebr. L. 1. C. 5. p. 20. & Langii diss. de nuptiis prohibitis ad h. l. §. 16. p. 20. Vide & supra p. 8. Innuit autem verbum קִרְבָּה *concubitum* , ut sequentia docent , maximè comma 14. idemque est ac לָקַח & שָׁכַב Lev. XX. 11. sqq. Alibi נָגַשׁ dicitur Ex. XIX. 15. & בּוֹא Gen. VI. 4. XVI. 2. XIX. 31. XXIX. 30. Jud. XV. 1. 2. Sam. XI. 4. XII. 24. itemque נָגַע Prov. VI. 29. Confer & Gen. XX. 4. Jes. VIII. 3. Ez. XVIII. 6. Pari ratione Græcè πλησιάζειν idem est , quod concumbere. Ita 2. Macc. VI. 4. ubi : ἐν τοῖς ἱεροῖς πειρῶσιν γυναῖκες πλησιάζουσιν. *inter septa sacra mulieribus appropinquantium* sive cum illis concumbentium. Loca ex Scriptoribus Græcis adfert Gatakerus in diss. de novi Instrumenti stylo C. 11. Opp. T. 1. f. 78. b. Judæi putant , voce קִרְבָּה designari tantum lascivos amores , quæ via ad concubitum sternatur , qui posterior demum sit *revelatio nuditatis*. Ita Elias ben Mose, Karæus apud Meyerum de gradibus prohibitis C. 3. §. 8. p. 18. שֶׁהַקִּרְבָּה רְמוּ לַמַּעֲשֵׂה הַדוּדִין וְהַגְלִי רְמוּ אֵל מַשְׁמַת מוֹשֶׁה הַשְׁכִּיבָה Ita & Abarbenel & R. Levi Barzelonita monent, Mosén hîc *sepem* facere , & nimiam appropinquationem, cohabitationem & familiaritatem cum proximis consanguineis & affinibus prohibere , ne vel tandem ipse incestus hinc sequatur. Unde & ipsa prava concupiscentia antecedens hæc voce prohibita videri possit. Matth. V. 28. Vide Hottingeri Jus Ebræ-



orum p. 278. 279. Hinc cel. Zeltnerus in diff. cit. C. 2. §. 2. p. 34. sqq. existimat, genuinam rationem conjugiorum prohibitorum hanc esse, quam & in ipsis hisce verbis innui putat, ut pronissima stuprorum & adulteriorum occasio, quæ aliàs ex familiari nimis consanguineorum & affinium convictu facile oriri possit, præcîdatur. Mireris, in hac dissertatione Theologum eruditissimum sine ullâ heterodoxiæ formidine statuere, quod leges matrimoniales Lev. XVIII. occurrentes, quæ non sunt naturales, merè forenses sint & Judæis saltem datæ, quod & personæ saltem expressæ, non similes gradus hîc sint prohibiti. Nec movent sanè illum rationes ex repetitâ voce אִשׁ אִשׁ & ex voce תועבות, quæ aliàs & specialia nomina זמה *scelus* Lev. XVIII. 17. XX. 14. תבל *commixtionem* nefandam Lev. XVIII. 23. XX. 12. חסר *crimen* probrosum Lev. XX. 17. עון *iniquitatem* Lev. XVII. 25. XX. 17. 19. & נדה *fæditatem* Lev. XX. 21. sub se comprehendit, petitæ. Jam & idem Vir doctissimus, quod nunc demùm observamus, ubi in citatam ejus dissertationem incidimus, C. 1. §. 3. p. 8. id ipsum quoque urget, quod nos supra p. 7. 8. urgebamus, vocem כל *omnis* ex idiotismo linguæ sanctæ non *singula* simpliciter innuere sed crebrò restringi ad speciem, cui propriè competat.

לגלות ערוה ] *ad revelandam nuditatem.* Vox ערוה, uti & voces מער & מעורים, quæ descendunt à radice ערה *nudatus fuit*, per ἀνύφρων designant id, quod illegitimè nudari sine turpitudine haud potest. Ita rectè Abenefra ad h. l. : ערוה שם מגונה נחשף צריך להתכסות : *Est nomen turpitudinis denudatæ, quæ tegi debet.* Designantur itaque hâc voce membra genitalia corporis humani Gen. IX. 22. 23. Exod. XX. 23. 1. Sam. XX. 30. Jes. XX. 4. XLVII. 3. Ezech. XVI. 8. 36. 37. XXII. 10. XXIII. 10. 18. 29. Hof. II. 11. Nah. III. 5. Habac. II. 15. Thren. I. 8. quæ aliàs & dicuntur בשר ערוה *caro nuditatis* Ex. XXVIII. 42. vel בשר *caro* simpliciter. Deut. XXV. 11. Judæi voce עריות designant concubitum quemvis illicitum, maximè incestuosum. Hîc verò honesto verbo ( vox enim obscœna שגל est, quæ cum שכב Deut. XXVIII. 30. Jes. XIII. 16. Jer. III. 2. Zach. XIII. 2. permutatur, ) designatur concubitus sive legitimus sive fornicarius, φερός ad utrumque spectante. Vide Fessellii adversaria sacra L. 2. C. 1.



Unue & ex concubitu incestuoso & fornicario uti consanguinitas, ita sanè & affinitas contrahitur. Amos II. 7. 1. Cor. VI. 16. Ut adeò miserè hîc peccet Marshamus in canone chronico, ubi p. 172. hæc habet: *Lex de uxoribus tantum loquitur: neque est incestus, nisi ex matrimonio, non ex stupro seu adulterio.* Certè enim *φρόνις* retegere nuditatem generalissima est, ad stuprum & adulterium æquè ac ad matrimonium quadrans. Sed quid est quæso *דבר ערוה* Deut. XXIV. 1. ubi de marito uxorem dimittente, quòd in ea *invenisset nuditatem rei.* Num & hîc concubitus illicitus cum alio adeoque incestus vel adulterium significatur, idemque adeò dicitur, quod Matth. V. 32. Christus dixit, uxorem dimitti posse ob *λόγον πορνείας*, rem aut causam fornicationis? Certè à Christo his verbis ad Deut. XXIV. 1. alludi haud absque fundamento statuisse videtur Buxtorffius in diss. de sponsalibus & divortiiis p. 121. Ast non existimaverim ego, *דבר ערוה* & *λόγον πορνείας* unum idemque esse. Primò enim non dicitur *דבר ערוה*, quod esse posset *λόγος πορνείας*, sed *ערוה דבר*, quod Græci rectè verterunt *ἄχρημον πρᾶγμα*. Secundo pravæ Judæorum consuetudini in lege Mosaicâ notatæ & historicè saltem recensitæ sed non approbatæ & per meram conniventiam permittæ Christus effatum suum opponit Matth. XIX. 9. id quòd jam antea fecerat Malachias Propheta II. 15. declarans, Deum divortia odio habere, ubi haud displicet versio Zepperi in explanatione legum Mosaicarum forensium L. 4. C. 17. p. 391. quæ hæc est: *nec ullus ita facit* sc. repudiat uxorem, *cui adhuc שאר רוח* reliquiae sunt conscientiae. Et quomodo ullus hoc faceret, qui querit semen Dei? eandem sententiam tenente Lud. de Dieu ad h. l. p. 740. & ferè quoque Neunherzio in diss. ad h. l. Videantur, qui peculiare in h. l. dissertationes dedere vel saltem datâ operâ illum illustrare, Marckius, Köppenius, Grünenbergius, Reimius, Beheimius, Starckius, Gebhardi, adjunctis glossis nostris Germanicis ad h. l. Tertio, si adulterium hic voluisset significare Legislator Deut. XXIV. 1. consueta voce vel *φρόνις* illud specialius expressisset. Jam & quarto constat, adulterium in V. T. fuisse morte punitum. Vide Lev. XX. 10. Num. V. 21. 27. si quidem mortua ex aquis istis amaris fuerit adultera, quod probabile est, licet diffiteantur hoc Judæi in Talmude, Deut. XXII. 22. Joh. VIII. 5. Itaque ergo vox *ערוה* hîc in genere rem, sive physicè sive moraliter turpem



pem ac fœdam significat , uti & Deut. XXIII. 15. sumitur. Itaque *neditas* hîc *turpitude* aut *fœditas* est , & *turpitude rei* est *res turpis*. Inter duo enim substantiva , quorum unum in statu regiminis est , prius vel posterius rationem adjectivi habet. Vide Glassii Gramm. sacram L. 3. tr. 1. can. 8. Unde secundum nos ערות דברי Deut. XXIV. 1. præcisè nec incestum nec adulterium , saltem non demonstratum & publicum , ad quod verba ista restringit Steph. Morinus in diss. 6. de divortiis p. 233. sed obscœnos , lascivos aut turpes gestus moresque suspectamque vitæ rationem , vel & alia vitia corporis & animi , gravia & turpia significat , quæ & Schammæanæ apud Judæos scholæ olim fuit mens. Confer Aug. Calmeti diss. sur le divorce , Comm. in Deuteron. præmissam. Alius itaque hic casus est , ac ille , qui Num. V. 12. sqq. de muliere Sota sive adulterii suspectâ occurrit , ubi zelo actus vir ex capite adulterii tantum non probati , adeoque ex majore causa egit , quàm est ערות דברי , alius & casus , qui Deut. XXII. 13. sqq. habetur de Viro uxorem recens in torum admissam ob defectum virginitatis accusante , ubi saltem ὡς ἐν παρθέτῳ notamus , linteum sanguine tinctum non admitti à sapientissimo Legislatore tanquam signum recentissimè amissæ virginitatis certum & indubium , cum nec ex ejus , linteî nempe sanguine tincti defectu validè agere potuerit contra uxorem ex capite virginitatis corruptæ , multo minus adulterii adversus sponsum commissi maritus , sed saltem , tanquam signum , quod legitimam præsumptionem pro eadem creet , & contra quod nonnisi argumenta maximi roboris , demonstrativa illa , admitti debeant , ut adeo non opus sit , ad salvandam hanc legem ad miraculum hîc recurrere cum Brücknero l. c. C. 20. de divortio propter errorem circa virginitatem , n. 16. p. 128. 129. maximè cum olim apud Judæos hoc virginitatis signum certius esse potuerit , ac alias Genes secundum Gerhardum de Conjugio §. 114. 115. & Pfeifferum in sub. vex. ad h. l. Etsi autem Schola Schammæana , cui & Karæi deinceps calculum suum adjecere , uti notant Triglandius de Sectâ Karæorum C. 7. p. 99. 100. & Meyerus in diss. de repudiis & divortiis uxori Christianæ annexâ p. 136. 137. hîc peccaverit , quòd divortia & extra casum adulterii legitima declaravit , quod nescio , cur , Gemarâ xpresse contradicente , negent Altingius Opp. T. 2. in parall. vatic. V. T. in N. cit. f. 19. Basnagius dans l'histoire des Juifs L. 6. C. 23. §. 14.



p. 525. Wolffius in Curis ad Matth. V. 32. p. 103. & Thomafius de crimine Bigamiæ. §. 38. 39. cum Vesperis Groninganis p. 176. 177. cum & constet, in Mass. כתובות C. 7. plures allegari causas divortii legales, ad quas sanè & adulterium pertinet, ob quas idem vel injunctum vel saltem permissum à lege fuit, & Schammæanis & Hillelianis hîc consentientibus, qui de causis divortii privatis saltem inter se disceptavere, quam in rem conferri potest Seldeni Uxor Ebr. L. 3. C. 17. 21. magis tamen peccavit Schola Hilleliana, quæ ob quodcunque vitium, quemcunque defectum divortium fieri permisit, atque & ipsa ad Deut. XXIV. 1. provocavit, sed interpolans verba, quasi exstaret ibi ערה או דבר *turpitude vel res* quædam alia, displicentiam quæ creare posset, adeoque *πᾶσαν αἰτίαν* Matth. XIX. 3. maxime autem peccavit R. Akiba, qui hanc divortii rationem sufficere edixit, si saltem uxor *gratiam* haud invenerit in oculis mariti comm. 1. & alia magis placeat. Vide Seldenum l. c. L. 3. C. 20. 21. Buxtorffium l. c. p. 88. Hoornbeekium de convertendis Judæis L. 7. C. 6. p. 520. sqq. Meyerum l. c. p. 134. sqq. & Marckium in Sylloge diff. V. T. Exerc. 15. Displicet ergo nobis sententia & Lightfooti, qui putat, per ערות דבר adulterium significari, & Spenceri de leg. Hebr. ritual. L. 3. sect. 3. p. 21. itemque Zepperi l. c. p. 390. qui contendunt, Moſen καὶ πᾶσαν αἰτίαν, *ob quamvis causam* divortia permisisse. Sed displicet & sententia Grotii, qui Matth. V. 32. XIX. 9. exemplum saltem causæ divortii legitimæ proponi à Christo existimavit, illorumque, qui per λόγον πορνείας Matth. V. 32. *rationem* adulterio similem intelligunt, uti Brochmandus in loco de Conjugio C. 4. Quæst. 55. & Hemmingius apud Dedekennum Conf. Vol. 3. f. 316. alique, etsi certum sit, τὸ παρεκλῶς & εἰ μὴ Matth. V. 32. XIX. 9. non causas majores & æquales, haud quidem respectu Legis divinæ sed vinculi matrimonialis tales, sed minores saltem & πᾶσαν αἰτίαν excludere, displicet & mens Seldeni l. c. L. 3. C. 23. qui post Augustinum vocem πορνείας latissimo sensu heic accipi putat, uti & Prücknerus l. c. P. 2. C. 17. n. 5. sqq. p. 27. qui quodvis ferè delictum eâ innui existimat, assentiente non quidem ill. Bœnnero, sed potius Kaysero in diff. cit. C. 3. §. 12. p. 49. licet vox πορνεία & incestum & scortationem & adulterium & promiscuam venerem aliaque carnis delicta, imò & idololatriam aliàs denotet.

Vide



Vide diff. nostram de abrogatione legis ceremon. p. 43. 49. 50. & ad de Meyerum l. c. p. 133. sqq. Quod restat, cū ערוה per *turpitudinem* hīc vertat Vulgatus, malè hinc arguit Bellarminus de matrimonio sacramento L. 1. C. 5. col. 1300. ipsi actui conjugali turpitudinem quandam inesse, quia per *revelationem turpitudinis* describatur, provocans insimul ad 1. Sam. XXI. 4. 5. Jes. LII. 11. Rom. VIII. 8. 1. Cor. VII. 34. Apoc. XIV. 4. Ast licet ערוה Deut. XXIII. 15. XXIV. 1. *fæditatem* significet, in nostro tamen loco *nuditatem* dicit. Vide Prückneri vindicias Biblicas ad h. l. Et, quī sacramentum à Deo institutum turpitudinem secum vehere possit, concipi haud potest. Non cohærent hæc principia. Ita Hackspanius in notis Philologico-Theologicis ad h. l. P. 1. p. 430. Denique posito, notionem turpitudinis & hīc valere, sermo est de incestu non committendo, qui per se turpis est, non de matrimonio legitimo. Ἡ αἰσχύνη enim ἡς γυνώτης demūm per lasciviam se exerit. Alia est nuditas innocentiae, alia ignominiae. Gen. II. 25. III. 7.

אני יהוה ] *Ego sum Deus.* Ellipsis verbi substantivi Hebræis familiaris. Nota, clausulam hanc, quā Deus ut Dominus & Rex Judæorum specialis atque Θεοκρατωρ Ex. XX. 2. Lev. XX. 24. 26. Deut. XXVI. 17. 18. & ut *Deus exercituum* vel tribuum Israëlis, (hâc enim ex phrasi Theocratiam populi Israëlitici deducit quoque Spencerus l. c. L. 1. C. 1. sect. 2. p. 179. 180.) hoc prohibet, non arguere, prohibitiones Lev. XVIII. contentas omnes esse juris naturalis divini, vel saltem positivi universalis. Vide supra p. 4. Quod dum dicimus, addenda nobis circa hanc quæstionem est observatio Marshami in canone chronico p. 172. ingeniosa sanè. Ait is, Lev. XVIII. interdici & Ægyptiorum & Cananæorum perversas consuetudines, quod legis præfatio comm. 3. indicet: *ne faciatis juxta factum terræ Ægypti, in quâ habitâstis*, quæ verba priorem legis partem usque ad comma 19. spectent, *neque juxta factum regionis Canaan, in quam ego vos introduco*, id quod ad posteriorem legis partem pertineat, quā Molochi sacrificia, adulteria, pæderastia & bestiarum concubitus interdicator. Quod si ita est, vox *omnis* comm. 24. sqq. prorsus restringenda ad verba proximè antecedentes veniet. Nec nihili sanè hæc observatio est, cū Cananææ quidem genti pœna exterminii fuerit irrogata, non Ægyptiacæ. Unde &

D

sunt,



sunt, qui *factum Ægypti*, de quo comm. 3. agitur, ad caput præcedens Lev. XVII. referunt, Elias ben Mose & Abarbenel, quos tamen refutat Meyerus de grad. prohib. L. 1. §. 6. sqq. p. 4. 5. Ast Cananæos & ob incestus commissos fuisse punitos patet ex Lev. XX. 22. 23. collatis versibus immediatè præcedentibus. Commodè in calamum heic labitur & alia observatio, quæ necessaria nobis videtur ad illustranda illa, quæ supra p. 2. 3. diximus de Judæis, quòd legibus matrimonialibus Lev. XVIII. scriptis & gentes obligari existiment. Opinio hæc Doctorum Judaicorum universalis non est. Ita enim R. Akiba & R. Jochanan sentiunt, *de omni incestu, ob quem pœna mortis à Deo inflicta sit* Lev. XX. 11. sqq. *admoneri gentiles, de incestu verò, cui pœna mortis ibi non irrogetur, eosdem non admoneri*, quæ eadem Maimonidis sententia est. Vide Seldenum loco supra p. 2. citato, maximè & Meyerum in responso ad quæstionem matrimonialem, an viduæ licitum sit nubere defuncti mariti sororis filio, seu an Vir avunculi sui viduam ducere possit? §. 16. p. 15. Ut taceam horrendam illam, quam de profelytis suis foveat Judæi in Talmude, sententiam. Tradunt quippe, cum virtute profelytismi prior omnis cognatio gentilis evanescat, ejusmodi profelyto fas esse cum matre, cum filiâ, cum sorore se commiscere, eam ipsam ob causam, quia vetus evanuerit cognatio, imò fas hoc esse, si eodem tempore & illæ ad Ecclesiam Judaicam transeant, ita & profelyto ante profelytismum patris concepto licere ducere sororem in profelytismo natam, et si & ille in tali natus esset. Quo de argumento fusè agit Maimonides in *בית דין* sive de coitu prohibito C. 14. Vide Seldenum de J. N. & G. sec. disc. Ebr. L. 5. C. 17. 18. Juræum dans l'histoire critique des dogmes & des cultes des Juifs P. 1. Ch. 20. p. 153. sqq. qui idem & leges matrimoniales Lev. XVIII. quæ naturales haud sunt, merè Judaicas esse putat p. 156. sqq. & Basnagium l. c. L. 6. Ch. 7. §. 1. p. 137. 138. Addere & hoc liceat ad ultima hæc textûs, quem explicamus, verba. Scribit Thomasius in Jurispr. div. L. 3. C. 2. §. 235. clausulam hanc: *Ego sum Deus*, Deum legibus hisce matrimonialibus eapropter adjecisse, *quòd omnium istarum prohibitionum haud investiganda sit alia ratio, quàm voluntas & liberum arbitrium prohibentis Dei*. Jam verò Deus hæc clausulâ non saltem ostendit, quænam causa datæ legis sit, divina quippe sanctitas, quæ heic exemplo nobis esse debeat Lev. XI. 44. 45. XIX. 2. sed &, quænam autoritate, divinâ nempe, leges hæc fulciantur, contra transgressores gravissimis pœnis vindicandæ. Exod. XX. 5. 6. Lev. XVIII. 24. sqq. XX. 11. sqq. Deut. XXVII. 20. sqq. Ita & errat Langius, cum in diss. cit. §. 22. p. 24. putat, clausulam hanc esse signum legum naturalium in hoc capite traditarum, maximè cum & ipse omnes has leges haud censeat esse naturales. Ita denique & hallucinatur Meyerus, qui l. c. C. 3. §. 12. p. 21. ait, hanc clausulam nulli legi speciali adjectam legi. Vide saltem supra p. 4.